

Date –23/09/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Agriculture Department leh MULCO Ltd. ten Natural Farming nasa zawka kalpui tura thawhdunna thuthlung an ziak.
2. AYUSH Mizoram buatsaihin vawiin khan Aizawlah Ayurveda Day hman a ni.
3. Cheng nuai 5 thleng damdawi in awm man a thlawna pek theihna scheme AB-PMJAY chuan vawiin khan kum riat a tling.
4. BJP Mizoram State President Dr K Beichhua-a'n AB-PMJAY hamthatna chu Mizorama a dawng thei zawng zawngin an dawn theih nan hma an la zel dawn a ti.



MULCO NATURAL FARMING

Agriculture Department leh Mizoram Milk Producers' Cooperative Union Limited (MULCO Ltd.) ten Natural Farming nasa zawka kalpui tura thawhdunna thuthlung an ziak.

Agriculture & Farmers' Welfare Department Minister Pu P.C. Vanlalruata hovin Agriculture Director Pi Vanramthangi leh MULCO Managing Director Pu Ramesh Kumar-an hming an ziak a ni.

Agriculture Minister Pu PC Vanlalruata chuan thusawiin, Mizorama kuthnathawktu, a bik takin ran vulha eizawngte tana hmasawanna tur rahbi thar Mizoramin a kai leh ta a ti a. Agriculture Department leh MULCO-te thawhdunna chu Mizoram tan thil chhinchhiah tlak tak leh ran -a bik takin Bawng vulhtute tana hmasawanna ropui tak thlentu a nih ngei a beisei a ti.

He thawhdunna hnuaiah hian Ran zun leh ek atanga leitha leh rannung thahna hlote siam chhuah a nih a, chung chu loneitu ten an hman tangkai hunah chuan mipui vantlang hriselna pawhin hma a sawn ngei dawn tih Agriculture Minister chuan a sawi a, thawhdunna hlawhtlinna tak tak chu Department hrang hrangte leh he lama mawhphurhna nei mi pawimawh tak takte bakah kuthnathawktute tanrualnaah thui tak a inngat tih hre reng turin kalkhawmte chu a chah bawk a ni.

Kan corr report ngaithla ang.

Agriculture & Farmers’ Welfare Department chuan National Mission on Natural Farming Scheme hmang hian kum 2025 atang khan hma a lo la tan tawh a. Tunah hian District tinah he Mission hi kalpui niin cluster 304 zet din a ni tawh a, heng cluster-teenkawltu tur hian Community Resource Person (CRP) 608 ruat an ni tawh a, Bio Resource Centre (BRC) pawh 72 din tawh a ni bawk.

Vawiina MOU ziah tak hi National Mission on Natural Farming Guidelines anga kalpui tur a ni a. Guidelines ang chuan Bio-input Resource Centre (BRC)-te hian bawng ek leh bawng zun hmanga siam leitha (organic fertilizers) leh rannung thahnate siam chhuakin loneitute hnenah an hralh chhuak thin anga, heng hi Natural Farming hnuaia loneitu in register te chuan hmang ngei tur a beisei an ni ang.



SEVA SANKALP : MISSION LIFE : LIFESTYLE FOR ENVIRONMENT

Sorkar laipuiin khawvel pum huapa khawtlang leh mimalte hnena environment humhalh tura hmalakna Mission LiFE (Lifestyle for Environment) chu Mizoramah pawh a taka kalpui mek a ni.

Akashvani Aizawl News zawhna chhangin, Environmental Information, Awareness, Capacity Building and Livelihood Programm (EIACP) co-ordinator Dr. Lalramnghaki Pachuau chuan Mission LiFE (Lifestyle for Environment) hnuaiah hian mipuiten leilung leh boruak (environment) tana khawsakphung tha zawk an lo neih theih nan hma an la thin a ti a. Mizoram chhung hmun hrang hrangah mipui nawlpuiin nunphung ngaia an lo neih tawh hrisel si lo thlak danglam turin mipui an zirtir thin a ti a. Heng zingah hian polythene hman that lohna te, bawlhhlawh hrang hrang- electronic waste leh solid waste thliar hran a paih dan inzirtirna te a tel tih sawiin, mipui bakah school leh college naupang leh nuho pawl te hnenah campaign leh workshop an buatsaih thin a ti a. Heng workshop ah te hian leilung leh boruak tana tha leh him zawk hmanraw siamchhuah te, bawlhhlawh a ngaih tawh tangkai zawka siam te, loneitute hnena leitha siamchhuah zirtir leh khuai khawi dan te chu mitinte hnenah a remchan dan ang angin zirtirna an pe thin tih a sawi a ni.

Byte: Dr Lalramnghaki pachuau

Mission LiFE (Lifestyle for Environment) concept hi kum 2021 November ni 1 khan Prime Minister Narendra Modi chuan Glasgow-a COP26 summit ah pulutin, kum 2022 October ni 20 khan Gujarat-ah a hawng a ni.



AYURVEDA DAY

Health Minister Lalrinpuii’n mipuite hriselna chawikan chu sorkar ngaihpaawimawh berte zing a mi a ni tih sawiin, tunlai damdawi chauh rinchhan lovin, hnam zia leh ram leilung nena inrem Ayurveda leh AYUSH system-te chu theihtawpa chhawm nun leh chawikan zel an tum tih a sawi a ni.

He thu hi vawiina Directorate of AYUSH Mizoram buatsaih Ayurveda Day Aizawl Central YMA Hall-a a hmanpuinaah sawiin, kumin Ayurveda Day thupui, "Ayurveda for a healthier tomorrow" (Hma hun hrisel zawk atan Ayurveda) tih chu tunlai khawvel nen a inmil hle nia a hriat thu sawiin, tunlai khawvelah nunphung inthlak danglam avangin natna hrang hrang- zunthlum, thisen sang, cancer leh lung lam natna a hluar tual tual lai hian, Ayurveda thuken natna laka inven hmasakna,

taksa rilru leh leilung inrem taka nunho theihna chu chhanna pawimawh tak a ni a ti a. Damdawi ei ringawt ni loin, chaw ei dan dik te, taksa insawizawi te, rilru hahdamna leh nitin nunphung thianghlim te chu hma hun hrisel neih theih nan a pawimawh hle tih a sawi a ni.



LADC

Sorkar laipuiin Village Council kaltlanga hmasawnna hna pawimawh hrang hrang a thawh thinna Finance Commission Grants & Rashtrya Gram Swaraj Abhyian (RGSA) chu Mizoram Sorkar in Autonomous District Council huamchhungah District Rural Development Office kaltlanga thawhtura a tih tawh chu sutin, Autonomous District Council enkawlina hnuaiah dahlet a ni.

Hemi chungchang hi vawiin khan Rural Development and Administration Department Commissioner and Secretary chuan tichhuakin, Finance Commission Grants & Rashtrya Gram Swaraj Abhyian (RGSA) chu Lawngtlai District leh Siaha District ah Autonomous District Council kutah dah a nih thu a tarlang.

Finance Commission Grants & Rashtrya Gram Swaraj Abhyian (RGSA) hi Autonomous District Council kaltlangin Village Council ten an huamchhunga hmasawnna hna pawimawh hrang hrang thawh nan an lo hmang tawh thin a, Autonomous District Council kut atanga lachhuaka RD Department enkawltura dah a ni chu an kutah dahlet turin State Sorkarah Autonomous District Council lam hian ngenna an lo thlen tawh a ni.



ABPMJY


Ayushman Bharat Pradhan Mantri Jan Arogya Yojana chuan vawiin khan kum riat a tling. He Scheme hi kum 2018 September thla khan Prime Minister Narendra Modia chuan Jharkhand-a Ranchi atangin a hawng a. Khawvela sawrkar siam health assurance scheme lian ber a ni. Prime Minister Narendra Modia chuan social media lamah Ayushman Bharat chu kum 8 kaltaa bul tan anih thu sawiin India mi tupawhin damlo enkawlina tha leh tlawm an dawn theihna tur a ni a ti a. Vawiinah chuan he scheme hmangtu hi vaibelchhe 60 chuang an awm tawh a ti bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



8 YRS OF AYUSHMAN BHARAT

BJP Mizoram State President Dr K Beichhua-a'n sorkar laipui hmalakna hnuaia kum khata cheng nuai 5 thleng damdawi in awm man a thlawn a pek theihna , Ayushman Bharat Pradhan Mantri Jan Arogya Yojana (AB-PMJAY) hamthatna chu Mizorama a dawng thei zawng zawngin an dawn theih nan BJP Mizoram chuan a hma a la zel dawn a ti.

Sorkar laipui hmalakna hnuaia mipui hriselna hmalakna kawnga khawvel a Healthcare Scheme lian ber te zing a mi Ayushman Bharat kum 8 a tlin pualin vawiin khan BJP Mizoram State President Dr K Beichhua chuan Aizawla BJP State Office-ah thusawiin, kum 8 liamta chhung khan Ayushman Bharat chuan India rama hriselna dinhmun a thlak danglam nasa hle tih sawiin, hriselna tha, man tlawm leh mi zawng zawng huapzo he Scheme hian a siam a ni a ti a. Tun dinhmunah he PM Healthcare hnuaiah hian ram chhung State leh Union Territory hrang hrangah mi vbc 60 chuanguin hamthatna an hmu tawh a, chhungkaw tam tak ten he Scheme avang hian an damdawiin senso-ah nasa takin sum an hum thei phah chu a lawmawn tak zet a ni a ti .

Dr K Beichhua chuan Ayushman Bharat chu Pu Narendra Modi-a'n mi tumahin sum leh pai harsatna avanga an taksa hriselna enkawlna kawngah harsatna an tawh loh nan a siam a nih thu sawiin, he hmalakna hian India ram hriselna system a ti chak a, mi maktaduai tam tak, a bik takin mirethei leh changhai zawk te nun tidanglamin, an hriselna a tihchak phah hle a ti a. Mizoramah pawh Ayushman Bharat hamthatna dawng thei zawng zawngin an dawn theih nana BJP Mizoram chuan hma a la zel dawn a, Mizoram mipuite pawh he ruahmanna chungchanga inzirtirna thehdarh tur leh India ram hrisel zawk, chak zawk leh hausa zawk siamna kawnga thawhpui turin a ngen tih a sawi a ni.



PLUCK & PLAY:

Ni thum awh tur Pluck and Pay Festival chu Vanhnuailiana Hall, Tualte-ah Tourism Minister Pu Lalnghinglova Hmar chuan a hawng a.

Pu Lalnghinglova Hmar chuan hman khat daih plastic tel lova he festival hi hman tum a ni a ti a, festival dang la awm turah pawh plastic tel lova green festival hmang turin hma lak tum a nih thu a sawi.

Kan corr report ngaithla ang.

VC

Tourism Department leh Khawzawl DC Office tangkawp buatsaih Pluck and Pay Festival ah hian Mipuite tlawh theih turin Chawngtlai-ah kiwi huan 3, sapthei huan 5 leh tomato huan 5 thlan chhuah niin, Tualte-ah sapthei huan 2, fanghma huan 5, tomato huan 5 leh bean huan 2 thlan chhuah a ni a, mipuiten a thlengtu khuaa loneitute huanah kalin thei leh thlai rah chi hrang hrang lovin, an lei thei dawn a. Chawngtlai kawn-ah kuthnathawktute thar chhuah leh siam chhuah zawrhna stall engemawzat a awm a, Zawlkhaw Adventure Club-ten zipline hmanga uai theihna an buatsaih bawk.

Chawngtlai Historical Society leh Tualte Vanglai Committee-te kaihhruaiin historical leh tourist site hrang hrang, Pathian tlang te, Nikuala Lungdawh te, Zo Hill Station te, pasalthate in hmun te leh hmun pawimawh dangte a tlawh theih a.

Heng bakah hian mipuite intihhlimna tur Mizo infiamna hrang hrang buatsaih a ni bawh a. Zaithiam lar tak takte hovin tlaiah concert buatsaih a ni bawh.

